

Fula - Sooje'en Deftere - Soldiers Scriptures

Efesu'en 6:10-18

- 10 Yeeso do, cembide nder kawtal mon bee Jawmiraawo. Acce baawde maako mawde cembidina on.
- 11 Koo'e balmi Allah fuu ngam haa on keba dartanaago dabareeji Iblisa.
- 12 Ngam en kabataa bee yimbe, ammaa bee ruuhuji kalludi gondi hakkunde asama bee lesdi, mardi laamu e baawde nder jamanuuru nyibbundu ndu'u.
- 13 Ngam maajum njoge balmi Jehovah, haa on keba dartanaago konneejo to nyalaade hallunde wari. To on njaalake koodume fuu, nden kam on tabitan.
- 14 Taaske kadi, taade goonga bana taadorgol, borne goonjaaku bana sulke.
- 15 Taaskitaare waajingo kubar sulhu laato pade haa kosde mon.
- 16 Koondey fuu njoge nuddinki bana wawarde mon. Bee maaki nyifoton kuri Saydaanu giiteleeji fuu.
- 17 Kufne kisndam bana hufneere njamndi, nange wolde Jehovah boo bana kaafahi ki Ruuhu Jehovah hokkata on.
- 18 Mbade dum fuu bee do'a. Tore Jehovah ngam haa o walla on. Tore mo foroy bana Ruuhu maako ekkitinirta on. Ayne, taa acce do'anaago yimbe Jehovah fuu.

Jabuura 91:1-16

- 1 Koomoy joodi haa danki Jawmiraawo, koomoy foofti haa dowdi Jehovah Baawdo,
- 2 wi'an Jawmiraawo: "An woni aynoowo yam e kisnoowo yam, an woni Jehovah am, mi don hoolo ma."
- 3 Fakat, o hisnan ma e tuuforli hallube, o hisnan ma nyawu kallunju boo.
- 4 O suddan ma bee bileeji maako, haa maako a joodoto jam, goonjaaku maako aynan ma.
- 5 A hulataa kuuje kulniide bee jemma, malla kuri pidaadi nyalawma.
- 6 A hulataa nyawu ngiilotoongu nder nyibre, malla nyawji mbarooji caka nyalawma.
- 7 To yimbe ujineere ndo"ake kombi ma, koo ujine sappo boo, an kam a naawnataako.
- 8 A yi'an bee gite ma no Jehovah hiitorto hallube.
- 9 Jawmiraawo woni hisrude ma, Jehovah Banjiido woni aynoowo ma.
- 10 Ngam maajum a fottataa bee sarru, masiibo baditittaako saare ma.
- 11 Jehovah umran malaa'ika'en muudum be ayne dow laabi ma fuu.
- 12 Be eftan ma bee juude mabbe, ngam taa kosde ma pergo hayre.
- 13 A yaaban dow barode e bodde, a damman barode kallude e poosokje.
- 14 Jehovah wi'i: "Mi hisnan dakkotirbe bee am, mi aynan anndube yam.
- 15 To be torake yam, mi jaaboto be. To be billake, mi wondan bee mabbe. Mi

hisnan be, mi teddinan be.
16 Mi seynan be bee juutal balde, mi hisnan be fakat."

Jabuura 18:1-51

- 1 Daawuda, suka Jawmiraawo yimani mo yimre nde'e saa'i Jawmiraawo hisni mo juude konne'en maako fuu, juŋŋgo Sawulu boo.
- 2 Mi yidi ma masin, ya Jawmiraawo, dokkando yam sembe.
- 3 Ya Jawmiraawo, haa maada kisanmi, a laatani yam bana tapaare, bana berniwol boo. Haa maada tawmi hisrude, ngam maajum mi don hoolo ma. A aynatam bana wawarde, an woni kisnoowo yam cembiddo.
- 4 Mi toroto Jawmiraawo, karko o hisnatam. Yettoore laatano mo!
- 5 Waade habbi yam bee boggi mum, maaje halkere kulni yam.
- 6 Mi nasti tuuforli waade, nde taarni yam bee kabborli.
- 7 Nder billaare am toriimi Jawmiraawo, mi wookani Jehovah am. Haa haykaliiru maako o nani sawtu am, bojji am njotti noppi maako.
- 8 Nden lesdi dimbi, diwni. Cabbaaje kooseeje ndiwni, ngam tikkere Jehovah dimbi de.
- 9 Cuurde ngurti haa kine maako, yiite nyaamooye wurti haa hunduko maako, jamni ?ulbe.
- 10 O leestini asama, o jippi, duule baleeje don les kosde maako.
- 11 O wa"i dow bileeji malaa'ikaajo keruba, o leeri nder hendu.
- 12 O suudi nder nyibre, o moji duule baleeje, keewde ndiyam.
- 13 Mallimallooje e ?ulbe yiite ta"i duule, de iwi haa jayŋgol ardiŋgol mo.
- 14 Jawmiraawo telbi haa asama, 'Baŋgiido towni sawtu mum.
- 15 O fidī kuri maako, o sankiti konne'en maako. O sakkini ma"e, o hulni be.
- 16 Ndiyam mbeela seeki, les maaga wanji, cabbaaje duniyaaru cudditaama ngam daliila telbuki Jawmiraawo, ngam poofde tikkere gurtiide haa kine maako.
- 17 Jawmiraawo mo asama forti juŋŋgo mum, nangi yam, wurtini yam ndiyam.
- 18 O hisni yam juude konne'en am sembidbe e wanybe yam fuu, burdube yam sembe.
- 19 Nyalaade sarru am be ukkani yam, ammaa Jawmiraawo jogi yam, taa mi dimbo.
- 20 O wurtini yam billaare, o hisni yam, ngam o yidi yam.
- 21 O woonani yam, ngam mi goonjaajo, o warji yam, ngam o anndi juude am laabi.
- 22 Mi tokki laabi Jawmiraawo, mi yeddaay Jehovah am.
- 23 Mi dowlani umrooje maako fuu, mi luutaay muuyo maako.
- 24 Mi walaa aybe yeeso maako, mi reenti taa mi wada hakke.
- 25 Ngam maajum Jawmiraawo warji yam fodde goonjaaku am, ngam o anndi juude am laabi.
- 26 Ya Jawmiraawo, a goonjaajo hedi goonga'en, a booddoo hedi woodbe,
- 27 a laabdo hedi laabbe, ammaa a caatudo hedi faasiki'en.
- 28 A wallan leesbe, ammaa a leesnan mawnitiibe.

- 29 Jawmiraawo woni jayŋgol am, Jehovah am don riiwa nyibre taariinde yam.
- 30 Bee ballal maako mi ukkanto moobre konne'en, bee Jehovah am ndiwanmi mahol berniwol boo.
- 31 Jehovah oo, laawol maako ngol timmuŋgol, wolde maako laabi tal. O aynan hoolotoobe mo fuu bana wawarde.
- 32 Jawmiraawo men feere muudum woni Jehovah, kaŋko tan woni hisrude men sembinde.
- 33 Jehovah on hokki yam sembe, wadani yam laawol darnungol.
- 34 O hoynan kosde am bana de lelwa, o tabitintam dow kooseeje.
- 35 O ekkitinan juude am habre, haa mi tira koo lagaawal njamndi boo.
- 36 Ya Jawmiraawo, kisndam ma aynatam bana wawarde, nyaamo ma jogoto yam taa mi dimbo, hinnuye ma mawnintam.
- 37 A feesinan babal am, kolbule am ndimbataako.
- 38 Mi fartan konne'en am, mi jokkoto be, mi lorataako sey to mi timmini be.
- 39 Mi do'an be, be ummitittaako, be don mbaali les kosde am.
- 40 A hokkatam sembe ngam habre, haa mi jaalo konne'en am.
- 41 A lornan konne'en am baawo, mi halka wanybe yam.
- 42 Be ngooken ngam ballal, ammaa walaa balloowo be. Be ngookanan Jawmiraawo, ammaa o nanantaa be.
- 43 Mi naman be, haa be laato bana collaaje de hendu ruuynata dūm. Mi yaaban be bana loope haa laawol.
- 44 A hisnatam jokkirli ummaatooje, a wadatam laamiido le'i duuddi, yimbe be mi anndaano, dowtanto yam.
- 45 To be nani habaru am, be dowtanto yam, jananbe turoto yeeso am.
- 46 Be tampan, be ngurtoto berniji mabbe bee diwŋgol.
- 47 Jawmiraawo o geeto! Yettoore laatano aynoowo yam. Jehovah woni Kisnoowo yam, mangte mo!
- 48 O hokkatam jaalorgal dow konne'en am, o dowtinantam ummaatooje,
- 49 o hisnatam juude wanywanybe am. An, ya Jawmiraawo, a hokkatam jaalorgal dow konne'en am, a hisnatam juude toonyoobe yam.
- 50 Ngam maajum ngettan ma mi caka ummaatooje, mi yiman mangtoore ma.
- 51 A wadi yam laamiido, a don duddina hayru am. A don wanginana cubaado ma mo"ere, min Daawuda e asŋgol am haa foroy.

Pastor T. John Franklin
Church of Salvation, Healing, and Deliverance
COS-HAD.org